

四庫全書薈要·乾隆御覽本

集部

欽定四庫全書薈要

集部

御定歷代賦彙卷四十二

三

御定歷代賦彙卷四十二

治道

舜歌南風賦

以能感和樂生
殖羣物為韻

唐楊迺迺

雜

魏魏舜德於今人稱居北極而惟大歌南風以敷弘歌

之伊何制絲桐而合奏風之至矣信長育而有徵茲可
謂無為而自理天縱而多能美夫誠發深衷物能應感
憫沃瘠之勞逸均陰陽之舒慘是用作則於世利之孔

多風詠凱兮美萬物之蕃衍樂操琴也佳五聲以同和
復而不厭遠而匪他方將煦嫗之為意豈徒娛樂於斯
歌觀其發宮應徵揚清激濁自南習習同詩人喻彼棘
心入夜泠泠異貧士叩其牛角則知聖人審音以知政
化俗而作樂者有矣夫懿其出乎幽谷應以繁聲若雲
龍之潛召同律呂之相生萬籟動八音清匪鳴條而扇
物方靡草而作程是以人荷時康功歸帝力四氣以之
而不撓百穀從茲而蕃殖節有度守有則始從邇而及

遠終自南而徂北爾乃匪徐匪疾乍過乍聞颯颯輕音
疑少女之初至泠泠餘韻謂別鶴之求羣亦為父母之
罔極何必聲變而成文是以德冠百王致成萬物正南
面而恭已懋功千載不拂

舜琴歌南風賦

宋舒亶

帝意雖遠琴音可通欲發揚於孝道遂歌詠於南風寓
意五絃寫生成之至德託言萬物荷長養之元功粵其
耕稼陶漁至為君聰明睿智積諸已日深致孝之念躬

盡事親之理以謂鞠養之德欲言之不足生育之愛欲報之何以緣情指物孰形孝子之思流詠在琴且載南風之旨時其比屋熙乂巖廊靚深包我萬慮寫於一琴協天地以同趨按絲桐而播音作以叙情適在無為之日薰兮入奏永言至孝之心蓋曰風之於物也有化養之恩覃親之於已也有劬勞之德博眷物理之明甚假琴聲而遠託一彈而歡意以寫再鼓而羣心咸若按絃而奏聲參韶樂之淳寓象而言義並凱風之作懿夫琴

求以意而不求乎形器帝樂在孝而非樂於絃歌感民
之義豈並於北里思親之志固深於蓼莪藏韻於心非
止解一時之愠寄聲於政又將陶萬國之和自是正音
暢而化洽幽遐協氣流而時消滄瀟閨門聽之則翕爾
和順朝廷聞之則歡然感厲風被乃俗功歸於帝又得
夔工之奏同樂於民不煩鄒律之吹阜財於世茲蓋淵
默玩意優游面南歌孝風之遠暨託琴理以中含惜乎
道與世汨樂非德參操變而亡徒起後人之歎音調而

理空聞前史之談夫豈知音者道樂理之淳淳達孝思
之進進內將報德之罔極外以格民之大順然則歌琴
之意至矣哉莫如虞舜

舜有羶行賦

以天下歸之如
蟻慕肉為韻

唐謝

觀

肉不愛蟻蟻自來依舜不求人人自來歸爾則以羶生
嚮慕我則以思深惻微祁祁子來竟歡懷於德飽僉僉
類聚合霑濡以家肥是知取喻於彼欲明於此播薰風
於酷烈比黎庶於螻蟻溫恭允塞諒不阻於幽微玄德

升聞固無間於遐邇是故四海紛會千門競追共仰來
蘇之日誠非逐臭之時以孔甘為味以潤下為脂率從
其旨爰度迺私應其欲而徇矣思所利而噉之各竭血
誠汝則如飢如渴無勞肉視吾乃龍章鳳姿載求而羶
不在身三嗅而羶不在服在乎安長幼資亭毒行葉揚
芳言蘭芬馥以膏腴及萬姓萬姓熙熙以霈澤滂四門
四門穆穆咸遂其性各安其族並飲其風順雨調豈止
於觴酒豆肉若乃望之如日戴之如天不銷不歇沛然

靄然如此乃聞羶者焉如或失之於上迷之於下四罪
之徒三苗之野如此乃聞羶之者喻既斯大義豈憑虛
以心求芬芳者得以鼻求芬芳者踈自發德馨之惠寧
同乳臭之餘服媼媼之而孰可芬香擬之而豈如由是
蒸黎子來蠻夷蟻附八方咸戴其照育九土共臻其道
路惠然若歸往也如慕煥重瞳而日月清朗齊七政而
恩威布濩至矣哉巍巍堂堂可謂承天有裕

禹拜昌言賦

以聖人之心聞善必拜為韻

唐闕

名

大禹君臨勤求意深苟一言之入耳必載拜以明心蓋以勵華夷形古今所以旨酒盈前莫縱彈絲之響美詞將貢俄聞撼玉之音豈不以詢彼芻蕘防乎驕逸既可大而可久亦無固而無必所以嘉謀乍聽當業業以折腰直語纔聆復虔虔而屈膝蓋以廣乎所見求其所聞欲使善惡之源自別賢愚之路斯分况乎傳舜之規受堯之命得不固社稷根本察風俗利病是以臣不能諫君兮非曰忠君不能納諫兮非曰聖執至理以垂教採

昌言而化人苟有言可佐王道正人倫陶也不得不進
禹也不得不遵所以聞妙畧以開容拖冕旒而拂地覽
宏謨而致敬低珩珮以鏘身懼溝洫之未通憂禮樂以
將壞以正直為龜鏡以忠謹為規戒是以蘊昌言兮不
可不陳聞昌言兮不得不拜遂使共守丕業上光帝基
若魚水相逢之日同雲龍會合之時符郊時以陳儀固
難比矣望竹宮而設禮曷可方之我皇紹九聖之雄圖
舉百王之令典急於求士樂於聞善所以獻昌言之忠

臣必待之台鉉

下車泣罪人賦

以萬方之過在予一人為韻

唐闕名

人惟有罪罪實在予將恤刑於荷校遂責已而駐車顧
法令之未平滋彰甚矣儼冕旒而興念涕泣連如始也
備羽衛而行因巡狩而出遇茲拘繫將伏斧鑕王乃止
翠華駐清蹕恐法吏之苛暴嗟刑網之峻密稽鳳輦而
惻隱再三愍褫帶而幽囚非一於是降玉輅下朱輪議
獄緩死拖蔽垂紳出轅箱而欹歔交睫顧桎梏而汎瀾

滿中雖囹圄之中自罹有國之典恐網羅之內時陷無辜之人於戲法議難逃過亦有在致狴牢未空之事乃教化不明之罪初猶掩抑見天顏之慘悽漸覺滂沱濕袞衣之文彩承顏熠熠滿眼浪浪情將同於肆責義有軼於納隍是以顧盼悲泣徘徊感傷希聖旨於方輿之間必先一物推睿情於圓扉之下以及四方故得法制備修獄訟無怨由衷而感於黎庶自己而勛於億萬涕洟猶在宥物之義已彰縲紲未收率土之人知勸行道

而道斯遠矣愛人而人亦懷之何天網之自入使皇情以興悲蓋假其人為邦家之本因其事為慈惠之資不然何一降車而開二十世之業一灑淚而成四百年之基然後刑法永清威懷遠播是知夏后之得天下也能恤人而引過

高宗夢得說賦

以恭默思道帝
賚良弼為韻

唐李觀

殷之哲王唯政是恤夜分而寢夢獲良弼雖神悸而若驚冀形求而勿失爰徵營匠刻乎獨見之真乃俾庶僚

訪其唯似之質當厥夢也神馳無方未訖永夕如躋彼
蒼悅其神兮以浮偃其體兮若亡形接乃夢斯人甚良
側身徘徊於已之傍將舉趾以趨附又伸着而抑揚言
霏霏而無瑕目矍矍而有光觀其儀可用為列辟之式
察其志不獨稱百夫之防升降咸若周旋允臧寂乎昭
昭既寢不忘斯后克明承天之賚謂濟川之器而投足
不濡履大覺之端而遊夢無闕其中蕩蕩其表曖曖雖
助用理於一人實候清平於千載於是武丁夢於宮而

上與天通傳說築於外而中合神契持緡向老諒殊渭
水之涯負畚將疲久困傳巖之際說匪丁而空山長往
丁匪說而大位斯替如魚水之相因保君臣之雙麗惟
說也策名歸主惟丁也受命於帝帝何言哉邈以玄造
陰推吉士以佐有道說之居兮山之幽雲我我兮水浩
浩彼人兮何斯歛中心兮夢之如渴兮在茲如饑兮在
茲想遺眷以索隱撫空懷而歎思思之未得端宸沉默
其夢也則誠其寤也則惑其収之於野而寄之以國有

唐時雍上明下恭君與之同日臣與之比蹤事不惟舊
今之斯從斐而成章有媿雕龍

文王葬枯骨賦

以德及枯骨天
下歸心為韻

唐

白行簡

骨雖無知葬以表德展厚禮於九原示深仁於萬國惠
加於鬼則遊岱之魂有依義感於人故歸周之心不惑
原夫靈臺肇建璧池是穿宛彼枯骨委茲窮泉既靡覩
其銘誌曾莫知夫歲年西伯乃色變盡爾涕流泣然爰
命從者將收瘞焉俾夫惻隱之心因形骸而下至於地

升聞之德隨精魄而上動乎天徒觀其年代超忽英靈
淪沒土變豐肌苔封朽骨於是惠霑生死澤及榮枯遣
奠有加於蘋藻備物無闕於芻塗幽壤始開見佳城於
白日靈丘是啟旋卜宅於青烏既而遷彼古塋葬之中
野推誠於重泉之內昭德於普天之下念此窮塵之骨
尚或瑾之欲使行路之人不得見也且夫聖人哀死君
子表微用之於國而上下忻戴書之於史而載籍光輝
諸侯感而思服百姓從而知歸以之理人而人自化以

之奉天而天不違故能掩骼教行送終義立澤靡不浸
仁無不及恩加師旅而同德數千慶延子孫而卜代三
十且封比干之墓惟德是欽護信陵之塚其仁未深曷
若我國辨名氏莫知古今招亡散之魂復於棺槨收無
主之骨斂以衣衾蓋所以感鬼神而動天地豈止夫三
分天下而二者歸心

神女不過灌壇賦

以飄風疾雨慮
傷仁政為韻

唐王祭

有女維神徘徊恨新既入文王之夢方明尚父之仁君
莅灌壇自其來而有感妾臨西海將欲過以無因豈非
受命上天稟靈下土苟當鑒德之職誠是福謙之主然
而出則駕疾風鞭暴雨雖娉婷淑態所行皆正直之心
而倏閃陰徒在處有晦冥之苦今則望彼仁境居惟太
公於國而棟梁斯喻於民而父母攸同謚爾封疆無破
塊之時雨恬然草木絕鳴條之曉風安得暗恃威靈長
驅徒御不惟流麥以斯恐抑亦偃禾而是慮舊祠已別

固難返駕於今辰直道須遵豈可取途於他處是使淚
臉紅失愁蛾翠銷駐霞車而色斂停寶蓋以香飄潛羨
羿妻明月先逾於清夜却慙巫女輕雲已度於晴朝誰
見其迴惑蕙心踟躕蘭質感教化之均適患奔驅之迅
疾花顏慘淡非嫌勝母之時玉趾遲留異惡朝歌之日
王乃愍彼彷徨詢其感傷既非失珮於江上亦非遺簪
於路傍入夢之姿經三日以方過非熊之道歷千秋而
更彰則知執德感幽者繫乎真操心警物者由乎正苟

在神而猶懼豈於人而不敬若夫蝗越境而虎渡河未可與斯而論政

周公成文武之德賦

以公旦成此文武之德為韻

宋陳襄

天開周道臣有姬公滅管蔡流言之亂成文武盛德之風攝政宣謀纂徽柔之懿鏘勤王致理集保定之元功足以紹重光於有後揚休命於無窮者也當其待旦輸忠攝儀建極謂文考之興也方啟於周祚武王之立也

肇乎於商國念遺業之至重非冲人之可測我乃兼彼
三王之事成此二后之德踐祚而治卓興純被之謨陪
扈以朝庶廣丕承之則才美中著勲勞外施能勤教之
行也遂竭節以成之業業為師纘居岐之茂烈拳拳作
相隆在鎬之丕基蓋夫國得士而乃昌后非賢而罔理
惟文也順帝則而撫方夏是武也遏亂畧而為天子懿
王業以昭若賴我功而成此股肱周室啟明明在上之
猷左右成王紹諤諤以昌之美用能蕃衛中國疑丞大

君恢好仁之景範集偃武之清芬將以垂絲絲之陟昭
郁郁之文白屋禮賢緝多士濟寧之化東山祇役固一
戎大定之勲苟非績著勤勞心專夾輔上以追奉乎西
伯下以欽奉於姬武成休德於二代固重基於下土則
何以父作子述七百年永著徽猷發粟散財三十世茂
隆丕矩蓋以憂勞幹國忠利推誠遠啟中興之道光揚
未墜之名臯陶為舜帝之謨功宜一貫管仲霸齊桓之
業道匪相成此則昭致純熙削平暴亂本枝百世兮寶

系丕圖子孫千億兮英猷克煥噫奚知聖德之成焉由
茲公旦

周以宗強賦

宋沈初

古之建國制莫如周盛宗室而作庇強王室以承休治
尚以文重恩親於同姓世縣其祚大形勢於諸侯自昔
后稷開基公劉經始盛德物被豐功世美文武大其業
成康繼其軌奚永永以能然蓋親親而得以任先宗子
協圖夾輔之勲本固王家益植太平之趾天邑中奠侯

封外崇大邦小邦兮我所錫壤伯父叔父兮汝其懋功
鞏國勢於寔盛粹民風於大同膺木德以當天王圖以
永法轄星而建屏邦本其隆有袞服以華其躬有金輅
以優其命寶玉分賜脈膳均慶所以等異諸臣恩先庶
姓史稱乃德盛陳過歷之期詩大其功茂著維城之詠
豈無異姓與之翊昌豈無列辟與之贊襄推本而治尚
親則強故蒼籙之興起始諸姬而阜康忠厚一時重本
枝而相輔儀刑百世壯基緒於重光至如魯衛之所分

邢茅之所附衆列邦壤一寧國祚歸然磐石之安屹然
寶鼎之措無煩兵革坐收禦侮之功不假山河自得為
藩之固譬夫木之殖枝茂者幹必大水之委源深者流
必長繫爾列辟輔予一王秦室寢微蓋削五侯之壤漢
邦未善徒恢七國之疆盛哉本本之扶持承承之操術
國五十兮比如犬牙之制年七百分縣如瓜瓞之實方
今宗也盛而國也強跨基圖於周室

沛父老留漢高祖賦

以願止前驅得
申深意為韻

唐王 啟

漢祖還鄉兮鑿駕將還沛中父老兮留戀潛然憶故舊
於干戈之後敘綢繆於旌旆之前白髮多傷鳳輦願停
於此日翠華一去皇恩再返於何年昔以羣盜并興我
皇斯起英明天授其昌運神武日聞於舊里今則秦楚
勢傾鼓鼙聲止聖代而陽和煦物元首明哉暮年而蒲
柳傷秋老夫耄矣然而黃屋才降丹誠未申豈可風馳
天仗雷動車輪一則以情深閭里一則以義重君臣隆

準龍顏昔是故鄉之子捧觴獻壽今為率土之人乃曰
陛下創業定傾順天立極臣等犬馬難效星霜屢逼窺
泗水則淒若舊風指芒碭則依然故邑眷戀難盡沉瀾
易得昔日望雲之瑞豈有明言當時貰酒之家堪驚默
識帝乃駐天步遂人心戈矛山立貔虎煙深草澤初興
雲路而蛟龍奮翼鄉園重到煙空而鸞鶴歸林時也親
友咸臻少年并至縱兆民如子恩更洽於故人雖四海
為家情頗深於舊意往事如觀流光若驅望幸誠異攀

轅則殊交遊既阻於秦時堪悲今昔黎庶正忻於堯日
自恨桑榆已而雙淚盡垂一言斯獻請沛為湯沐之邑
實臣愜死生之願是使萬歲千秋杳冥無恨

四皓從漢太子賦

以俱出山中共
輔明德為韻

唐
王 綦

夏黃綺季角里園公抗跡君臣之外潛身商洛之中高
帝搜揚竟不歸於北闕儲皇搖動皆來衛於東宮漢之
初也鳳輦情乖龍樓恩失將謀廢嫡以立庶欲易黃裳

而元吉呂后憂深留侯計密且曰四人可致一匡承逸
洎安車奉迎之後當彤庭侍宴之日森爾離立皤然間
出似八公而少半疑五老而無一高皇問曰從者誰乎
安得鶴氅斯衆霜鬚與俱乃言曰臣等質同蒲柳景迫
桑榆是商嶺卧雲之士皆秦朝避世之徒邦無道則隱
邦有道則愚上曰自朕之興待賢而用顧朝廷之未治
念先生之所共昔何遠跡不為率土之臣今乃辱身盡
作承華之從對曰陛下掃蕩寰宇秦降楚平未有稱臣

之意惟聞慢士之名太子則卑謙守節柔順利貞理有
承聖斯宜繼明臣等惟義所在非道不行雖蹈夷齊之
潔更無伊呂之情故得隨雞載之差肩向龍墀而接武
星星於朝行之列濟濟於王人之伍帝曰空勞逋客來
撫藐爾之孤可謝周人已有良哉之輔既而問安之位
克定肥遯之心共還其來也鶴集丹陛其去也雲歸故
山懿夫出彼巖巖成茲羽翼一則免扶蘇之危一則祛
獻公之惑誰知惠帝立而劉祚安乃採芝公之德

泰山父老望登封賦

宋田錫

吾皇帝厚德比於坤元至仁侔於穹昊伊岱宗之父老
望皇華以外告傾心精意向天闕以虔恭頓首斂容冀
綸言之布誥豈不以思深寢育惠感生成桑榆之景方
暮葵藿之心迭傾檢玉高峰思覩登封之禮鳴鸞近甸
佇諧延望之誠咸曰帝嗣洪圖寰區晏如納生靈於壽
域侔至化於華胥北天山而南越裳爭輸職貢右流沙
而左滄海正混車書莫不天意與人心交泰民情與物

性相於斯乃運方契於千年得冥符於昊天雅頌溢路
人之采祥經盈太史之編泳鱗翔鷁已效靈於郊數靈
茅秬黍宜薦羞於上玄臣等幸以期耄之身為太平之
民生籍寄龜蒙之下先疇邇洙泗之濱七十二君古常
稱於茂典三千年後今正逢於聖人願陛下采古義於
前書命擇儀於良相勅宗伯修壇宮之禮詔太常建黃
麾之仗鹵簿鐘鼓圭瓚秬鬯展儀於梁甫之下禋祭於
靈峰之上虞君頌瑞願諸方伯之心漢帝射牛宜慰老

臣之望鶴髮兒齒精誠不已俯躬如就燥之燄注意比
朝宗之水朝濟雲彩諒龍德以堪從口比山呼冀鸞車
之戾止易曰先天弗違書曰肆覲羣后思古禮以猶缺
鬱衆心而是候泥金報天德之高封土增坤靈之厚協
探策之冥數薦如山之萬壽小臣亦能著封禪之書向
皇風而拜手

漢文帝罷露臺賦

以百金休功萬國從化為韻

唐李程

偉漢文之君臨惟宮室有度以兆庶為心安不忘危豈
勞力於累土用過乎儉亦軫慮於百金懼乎設怨將以
激勸若臺之是修唯德之不建是故絕役心於制造弘
儉德於億萬乃言曰臺者高峙路者四通不足避燥濕
寒暑無以受朝聘會同奚必高居為明四目遠聽為達
四聰不重創何以就役不勞力何以成功由是却匠人
之計全王者之德豈啻於財實肥於國雖百工麇至無
所作則庶人子來曷由陳力言之既終人故適從板築

之功既絕尋尺之材勿庸柱礎不施寧轉他山之石棟
宇罷構匪斲徂來之松若夫氣候為備順時布化諒惟
國之有恒成茲臺之何暇南至以望太史每升其觀臺
仲夏而居有司自設其高榭亦何用土木特建丹雘勤
修誠無用之作非不朽之謀豈止全十家之中產貽百
代之良籌彼晉靈登臨我則絕彈人之戲宋平興作我
則無築者之謳式昭莫大之見用保無疆之休不然何
以紹祉祖宗垂芳簡冊踰儉約於三五延載祀於二百

豈不以聲於露臺播無為之嘉畫

漢宣帝冠帶單于賦

以威懷禮加北戎遂定為韻

唐裴度

昔漢宣帝休明允塞烜中葉之英聲示遠人以文德既而幸甘泉以居正朝呼韓於有北錫之紱冕俾之藩翊位居侯王之上侍在軒墀之側服之孔備垂懸綬之腰章髮則有餘映切雲之首飾且會朝之次昭明孔融雖加之以禮實誇之以衷厥錫既殊荷榮華之寵命其儀

未習憎衣服之在躬此實可以閱帝聰播皇風亦何必
覓玉帛之資空成耗國錫金石之樂用表和我夫爵以
賞功服以旌禮懿爾容之中順故我命之光啟矧乃來
茲鳳闕踰彼龍沙知漢德之全盛厭胡俗之幽遐齊縞
帶於周行獨明向化異玄冕於醜類豈曰亂華錫之不
聞於屢褫崇之豈俟夫三加想夫解辯懷恩動容思媾
乍重譯而獻款或稽顙而奉贄使羣方之闔樂由一人
之錫遂鏘之玉佩顧韋韞而多慙頴以金貂與龐服而

自異是使孔熾之類率服而莫違悍戾之屬束帶而共
歸知子之來贈同雜珮彰君之化德乃垂衣殊沐猴而
可作方戴鷩而有威令我后散皇明而馳聖聽致戎夏
之克定勤厲理而明弼諧故蠻夷之允懷尚冠帶於萬
里舞干羽於兩階彼長纓之與五餌何斯道之孔乖

八使出巡賦

以彰善貶惡點
涉幽明為韻

唐張友正

明明漢皇文物昭彰順帝以化俾人從康將欲敷聖政
舉皇綱乃分國之八使而宣命於四方八使伊何朝中

之善將假其權尤難其選稱直指而獨立歌皇華而分
遺繡衣既盛於新儀四牡載光於古典當官而行受命
無忝善微毫而必舉惡纖芥而必貶舉善兮必尋其清
流之源貶惡兮必去其阿諛之諂或負宮闕之厚拔不
顧城社之微托無懼薰燒不驚增繳肆豺狼之毒懷梟
獍之惡徑持斧而前進歛下鞫而直搏誓將去大族而
拔盤根安問狐狸之與鳥雀其有銳心公器戮力王室
知賢才而能進察姦佞而能黜必將上聞於天子寧俟

於終日道之不憊人亦焉度操利劍而刺其固懸明鏡
而燭其幽使乎使乎萬方觀德天下之治也賢者當其
權天下之亂也不肖居其職求訛偽之訟採妖豔之色
方直者於以退藏阿諛者由是登陟若謂之治也歟適
足以亂其國我國家統紀有經迨古作程采虞典之考
績法漢家之分行舉八元而普天輯睦按十道而攬轡
澄清太階既平君聖臣明豈待久於其道而後天下化
成

手署三劔賜名臣賦

以特書嘉號用
獎賢能為韻

唐王綽

漢章帝以錫賚情重君臣道全示署劔推恩之禮表經
邦佐命之賢雖彼百官分恩光之渙汗惟茲三者觀御
墨以昭宣是知器挺臣功名由天獎非霜刃無以表汝
之庸勲非乾文無以重予之慶賞所以昭冲和勸忠謹
鮫函盡啟決雲之狀盈眸彩筆初題垂露之文在掌豈
不以良佐斯得深謀可嘉或染翰而紀其敦朴或揮毫

而誌以文華彼錫彤茲我乃頌其秋水彼銘鐘鼎我乃
鏤以蓮花一則薛燭未逢風胡不識提攜可助於雄勇
佩服必資其挺特能使巨闕慙價豪曹失色乃署龍泉
之名以表韓稜之德一則龍藻日耀霜風雪凝麾之而
氛祲以歇帶之則威儀可聆斯亦剗鍾難媿斬馬奚稱
乃署漢文之號以旌邳壽之能一則利可衛身威能禁
暴愜項伯以將舞宜趙王之所好豈羨乎五色奇形千
金美號乃署推誠之字以彰陳寵之操故得光生環珮

榮冠簪裾見魚水相逢之際是雲龍契會之初數比夢
刀各獲君前之賜功齊神筆長吞天上之書洎吾皇威
被華夷德安岐雍鋒銳不自其手署頒賜盡歸其公共
蓋以韓魏為缺兮宋為鐔異漢朝之所用

述聖賦

太宗御製序

唐闕名

朕以二九之年屬天下喪亂毒流區夏禍徧郊畿羣雄
則逢駭雲興猛將則風驅霧合年二十有四慷慨京邑
電發中元震蕩三川掃清八荒及至壯年獲臨寶位然

乃遠夷委贄萬國歸心致使朝有進善之臣野無行歌之士節義盈於私室獄訟息於公門一尉候於東西混車書於南北由是偃組練而敷禮樂放牛馬而逸黎元方欲紀石封山握河沉璧功既成矣世既貞矣信可以優游暇豫作樂崇德者歟故因茲餘隙乃脩苑囿其勝地則有積翠凝碧其川阜則有濯龍平樂若乃南面雙闕北對芒山引洛浦之通波連郊廓之餘趾叢薄本麗加之以芳節池沼素美瑩之以初陽舞蝶遊絲帶清颿

而散影分花交柳映碧浪而成文巨樹千尋結輕煙而
聳翠危峰萬仞照落景而開紅雲氣縈巖似遊仙於巫
峽霓光染溜類濯錦於成都戲羽間關互飛沉於蒙密
遊鱗澆灑乍出沒於芰荷翔泳之美盡斯仁智之樂備
矣可以遁形匿跡可以養志恬神獨往襄城之中斯可
觀也藐然姑射之上何以加茲余每覽巢許之儔松喬
之匹未嘗不慨然慕之思可以脫屣長辭拂衣高謝歛
復以時運見羈因留連於大任徒有輕舉之志而不達

者其天意也豈人爲乎

臣聞立極著紀之初闢乾開歷之始上所以分垂象曜
下所以疆括地里惟大人之有作越百代而孤峙飛五
位以龍奮騰九萬而鵬起曩者炎運將終鼎命云絕四
溟波駭八維幅裂羽檄交馳邊烽並蕪長星夜掃車雲
朝結莫不望壁壘以靡旗對轅門而亂轍故得百城冰
潰千里煙滅固靈命之有在乃慷慨而投袂驅八駿以
雷擊馭六飛而電逝騰星劍以外倚振雲鋒而高竦既

後事而先謀亦先勝而後制兵有臨而必克功無往而
不濟龜策叶以符兆人神應而合契諒包項以駕軒實
孕皇而育帝足以光燭千祀足以祚隆萬世於是戢兵
偃武銘功紀勳採三代之逸經刊八方之遺籍搜隱遁
於林藪訪棲遲於巖石然後調玉律以定時測金儀而
考歷符洛下之前驗嗣容成之絕迹若夫流惠澤於瀛
表被仁風於區外窮人際以來庭踰九譯而決會莫不
削衽而崇禮樂解辮而襲冠帶參雨曜以齊明混二儀

以稱大信一人之致感實萬方之攸賴聖皇以令叶先
甲時惟仲春乃整法駕馭華輪六軍雷動萬乘星陳臨
濁河以北睠指清洛而東巡乃升雲闕俯天津朝萬國
禮百神珍賫咸集要荒畢臻夫其地也據三川以設險
憑四闕而作固總奔湊於八方測圭影於中度既定鼎
於周業亦克昌於漢祚望嵩巒之邈迤臨峭坂之迴互
所以仰叶辰象所以俯清天步若夫削靈巖以表闕疏
清派而為池極皇居之壯麗窮大廈之宏規抗修廓之

窈窕屬輦道而逶迤夕霞臨而錯落晨光照而陸離至
如雲觀晨開風亭夜敞迴長飆於輕翼凝濃露於仙掌
沉落月於壁臺挂奔星於珠網羅紈飄而散馥環珮動
而流響垂密葉於綺牕散飛花於翠幌復有天池濛沼
以嬉以遊鼓輕柁漾仙舟蔭喬木鏡清流魚鳥凌亂蘋
藻沉浮控飛梁以架迴列層閣以環洲漬檀藥之修竹
映迢遞之危樓風未生而葉動景將昃而光收若夫瑞
草竒色祥樹嘉名霏紅曜紫垂緗拖青或玲瓏於玉砌

或點綴於金楹交九衢而結影分四照以開榮浥朝露
而逾馥帶晨風而更輕於是登崇觀以周覽闢層軒而
遐矚樹含嶺而共青草帶原而同綠俯八紘而非遠顧
千里而為局飛霞斂而復舒輕煙斷而還續既神王以
情暢乃遣累而思足聆羣籟之晨響想鳳蕭之夜聲窺
叢雲之朝散思鶴蓋之後清捐大位而不寶脫萬乘而
為輕訪真人於姑射問至理於廣成志眇眇以遐顧心
遥遥而上征踐太微之崇閣闢閭闔之天扃拖紅旗於

絳闕翼芝蓋於紫庭咀靈氣而還壽吸玄液以駐齡若
夫北瞰太行南臨少室積峰遠而愈翠重巖隱而復出
乍鬱律以干霄又宕堯而概日松翳空而難辨鳥翔高
而易失屬天下之無事聊逍遙以自逸方欲登日觀以
縱金覽雲亭而駐蹕於是凝聖情以遠慮思成敗於終
古美揖讓於有虞壯成功於大禹恥用兵於中冀鄙窮
戰於丹浦每有違於汝弼恒知失而思補乃命促苑圃
散積聚改制度易規矩削侈麗於樓臺崇質素於階宇

仁好生而必遂德無貫而不輔習嘉禮於玉帛和大樂
於鐘鼓上可以降集羣瑞下可以安懷率土惟聖作之
可觀實萬物而斯覩顧微臣之庸朽濫叨選於詞林恒
戒盈以獻賦每規過而進箴幸天地之燾載欣日月之
照臨豈窺天而識象寧測海而知深徒望雲以考澤空
就日而傾心漸九臯而戢翰望天路以揚音美皇運之
方永嗟頽齡之遽侵顧鴻恩之未答徒頌德以長吟

高祖受命造唐賦有序

唐顧况

隋文帝滅陳蕩定海內煬昏多罪墜失先業身滅國替
幼恭以神人非聖莫可乃命太保蕭造奉皇帝璽綬歸
我高祖高祖固讓謠歌獄訟已歸唐矣而薛舉王世充
竇建德等陳勝倡禍為漢作階夫鹿臺之積非無財也
閭左之戍非無卒也湯以七十里文王以百里而臣諸
侯非有土也隋地徧天下二帝之業一朝掃盡可不謂
大悲乎吳公子札古之達天命者其歌唐思深哉其有
陶唐氏之遺風乎氣蒸芒碭龍曜太原天命也昔司馬

相如賦子虛諸侯之事非天子之事漢武聞之猶曰朕獨不得與此人同時班固張衡左太冲所賦兩京三都各務誇大而王者受命則闕而不書蓋賦者古詩之流古者採詩言之無罪今王澤不竭斯文未喪翰墨間作其誰曰不然先王建國始以文經上行下效終以武定疆本弱枝四方翕然無凶人矣故明德慎罰文王所以造周也應天順人武王所以克商也書云帝堯聰明文思帝舜濬哲文明斷自唐虞洎乎周漢帝王美稱以文

為首我唐文德宜在三代之上微臣賦頌恥居數子之下初論隋氏顛覆次論皇家開統末論告厥成功簡於上帝鋪乎下土播乎無窮固非常才淺慮之所能及意者實以祖宗光靈引耀鼓動之所致也其辭曰

在桓靈之道曠兮本小而末大下陵而上替君臣相失南北歷帝天醜隋而命唐纂周漢之鴻裔大哉文王王季其父武王其子父作子述叶天命以應期煬為不道庶官攜貳魚爛土崩荒沉所致雖曰匹夫之勇有盜中

原之意凶貫既盈果不保於神器江都之禍酷甚望夷
之事七國之君雖繇古而必類王者父天母地非所以
苟其身而貪厥位豈有男女疾痛而父母不為之歔歔
乎此真主所以乘時而建義也曾不一戰而得行其志
湯武應天也其實誓師高祖受禪也其實揖讓猶感恩
以慟哭乃立代而尊煬仗順而升蓋前經之所曠承土
德以播業今與炎靈而更王維李其根降居真源洎武
昭之隴胄揚太祖之周勳典則明融是將貽乎子孫高

皇生而豁達大度狗齊弱而能言神光佳氣兮爛以氛
氳兆白雀兮戴紫雲隱隱瞳瞳兮始乎太原君子得時
有如追奔岷峨導江兮河出崑崙雷砰電掣浩浩渾渾
厥波雖雄為海所吞乾健而坤順兮利配乾而法坤有
何姦豪恃險偷存乃建皇極鍾乎歷數革舊鼎新兮式
閭封墓走百神以咸秩兮包五嶽而作固過蒲津而川
后增流兮次霍邑而山靈告路彼上慘下黷兮我寬刑
以薄賦陋茅屋乎土階遵朱干與大輅乃有嚴更之署

環衛鈎陳文昌武庫玉冊韜府兮內八景之真文金盤
粲霞兮承九天之清露元聖有作恢法度也厥祖草昧
諸夏宗臣蠻夷酋長從德如歸若王固讓而天下可違
乎有社稷焉不可闕祀有蒸人焉不可無主是以木曰
威仰火曰燁怒辰戌丑未王我唐土天實若曰四海橫
波虔劉札瘥若王盤桓柰天下何義寧二年五月甲子
高祖即位木宮曰甲水宮曰子支干相生成字為李雖
子卯不舉而以是為戒此臣子所以服泰階也神祇叶

從龜筮攸同乃更正朔以刀文為開通告於上下予乃
昧德嘉乃丕績若將殞於厥躬草艾渠魁兮罔駕英雄
拔萬姓於湯火兮散三光於昊穹此皇王所以職教化
也非天不應非聖不作造我鉅唐在夏之興弼成九服
經啟九道荒厥迹之茫茫在周之興西至流沙東至樂
浪重九譯乎越裳在漢之盛大夏身毒月支夜郎辰韓
之國畫革傍行未若我唐歌其聲舞其容十有二部鏡
立乎中央唐既有土德樂亦有臣妾易曰殷薦上帝又

曰行地無疆提封所經聲教所被窮天下之琛怪截海
外之梯航逾蟠桃而跨弱水兮蓋四十萬里鳥飛驥驟
兮鱗萃乎餘鯨不以三代為境土七雄為富彊乎何則
漢高提劍學校興於文景周武載戈頌聲作於成康卜
代三十延祚四百亦謂之享國久長與夫青牛紺憶白
馬朱鬃報千祀於元君兮呼萬年於太行林邑貢能言
之鳥大宛奉汗血之馬孰與四白鹿四白狼乎擒建德
於武庫兮格魏公於教倉耕有三十年之蓄以備凶荒

戰有百萬衆之師以龍警戎羌胡驕則馬銜塞草寇虐則
龍決天潢又孰與周漢之廣建康莊在歲九天之下九
地之上兮合二九為一方凝碧樹於洞房送白雲於帝
鄉舞破陣於清廟兮準文始與西廂迎氣於東郊兮養
老於上庠禘祫之禮拒鬯圭瓚兮辟雍明堂襲蛟鑪之
馥馥壘鼉鼓之鐘鐘羽林孤兒青衿胄子森琳瑯以鏘
鏘河山巨防百二盤岡渭水貫都兮來天漢之湯湯浞
龍宮而捎鬼國延苑囿而峻墉隍驅馳駒駘犀象乘黃

附翼之馬骨騰肉飛滅沒陸梁鷲出女床鷄雞白鷗孔
翠翺翔縮沙磧與江相休徵四塞兮花萼連芳太容揮
絃兮子晉吹簧飛廉馳道兮河鼓服箱雍門韓娥流徵
叩商徹歌鐘於未央校羽獵於長楊升平既久兵設不
防虜自燕垂陷乎洛陽雲雷邁難金火耀芒上帝之哀
下人兮生魂魄而起膏肓肅宗龍飛日出鳳翔兮四誅
犬羊代宗赫怒兮草被嚴霜復九廟之郊禋三辰忽乎
曄煌扶已撓之厚棟維既絕之頽綱然一胡作亂四海

奔亡父習乎勇母抱其子乘城看戰電掃八荒天下大
定朝廷無事帝端拱於穆清呀漠渤以為池兮拓宇宙
以為城務子來之經營乃有棟宇之盛砥礎礧礧刻楛
雕楹甲乙於方中兮勢天矯而上征東西兩京岳立雲
峙宮室相望八百餘里雖千數萬名猶未盡也翼翼峨
峨重關四塞抵昆明而瞰太液象蓬壺之廣大踐太華
而節終南抱周秦之襟帶於是偃師偶人郢匠朽壤之
輩工發藻繪情生眄睐式瞻魄駭爰處體怵乃有輿服

之飾鏤轂錯衡霓旌羽蓋紋牕繡戶窅玲瓏以相對明
月夜光煥合影平其內青琴素女間木難之首飾響結
絲之腰珮嗟神人之叶和感雨露之霑濡職貢隘入舟
車溢載馮夷陽侯既降於英靈木魅山鬼不勞乎祈賽
於時太府太倉粟腐繒敗荔枝橘柚魚鹽惟錯之翦隘
幽明黜陟輕重約法之殿最重二百年天下九百餘萬
戶六千三百萬口徭輕斂寡國富家肥砢砢岌岌琅琅
磕磕兮沸渭駭沓訇訇噦噦兮亘地罄天來朝會兮天

子於是乎班瑞等威卑其君長降為牧守宸衿恢張以
天地之無外一萬二千年為一紀三萬六千年為一代
古者登太山七十二君兩漢踵武亭亭雲雲八百餘年
寂寥無聞我唐傳祚已來革隋一封岱二克復三除克
四五將發三門備南正司天北正司地勾測影於北至
建相風於南寺太微太一金版玉笥逮夫淹中闕里之
類蓋三十萬卷傾古今之文字振古以來未之有也其
事始於武德成於貞觀興乎開元天寶之間唐虞夏殷

之世不足多也然則天子四海為家六合為都方明參
乘昌寓為御三載考績五載一巡狩觀萬國之有無禹
會會稽舜遊蒼梧曰僕予后后來其蘇天子於是命有
司興農圃廢土木放女謁斥讒夫臣拜手稽首載陳厥
謨康哉良哉恥其君不及唐虞

魏侍中諫獵賦

唐黃滔

我太宗之啟聖崇基魏侍中之推誠輔時恐羽獵以失
德採風騷而屬詞瞻仰皇情欲止畋遊之事激揚丹懇

爰陳諫諍之詩當其內則雍熙外無攻討閒憶擒飛而
逐走靜乃搜林而索草殺傷有度雖知不損於仁心猶
狩非時或慮微妨於帝道於是傾素節揣深衷何以闡
禹湯之誠莫如陳周召之風願開三面之仁上行君聖
遂取二南之義下效臣忠爾乃揮以彩毫流於妙墨文
高而簡牘增煥思苦而煙霞動色莫不大罄箴規堅持
謹直輝珠耀玉面陳丹陛之前諷古諭今袖獻紫宸之
側錯落清昌錚鏦雅言敘獲獸爭禽之理述好生惡殺

之源少補玄化輕禪至尊字字而請休馳騁篇篇而乞
罷驅奔非不能繼子雲操賦而進非不能續司馬裁書
以論蓋以詩也中律鏘金成章璨綺掬山川氣象於彼
載帝王興衰於此以之刺上則上或風從以之化下則
下皆草靡所以搞此章句依於典墳希一覽而恩覃羽
族冀再觀而惠及毛羣庶幾六藝之妍終資睿鑒當使
三驅之禮不越明文然後甲馬休飛駢弓莫控俾百獸
以率舞致四夷之入貢故其旌逸調賞清詞錫綵繒而

甚衆

御定歷代賦彙卷四十二

御定歷代賦彙卷四十三

治道

王者父事天兄事日賦

以子弟誠賢國
家靡失為韻

唐
浩虛舟

二儀覆載德之廣者唯天三光照臨明之大者唯日故
王者於天也父事無怠於日也弟恭靡失布和施令將
成不宰之功明目達聰欲亞無私之質當其萬邦作貢

四海為家仰元氣而晨昏靡隔指陽精而伯仲非賒草
色難窮屢軫南陔之戀常陰易匿常思棣萼之華所以
化洽中原祥臻上國法寒暑觀從政之道無薄蝕見相
容之德登封泰岳猶疑陟岵之時展禮東郊似望在原
之力愛敬無斃恪恭盡虔窺一氣異歷山之泣攀六龍
為荀氏之賢覆燾成功且異靡瞻之義古今垂象難窮
以長之年且夫致敬唯精傾心仰止誰嬰同席之亂誰
效攘羊之旨曾聞有關遠懷幾諫之心每懼曰明寧有

遠遊之理所以惟法前哲規後嗣播洪猷恢至美教天下之為人子者矣又若卑已謙恭端心愷悌同明無終鮮之歎可愛有既和之體桑榆未及魯衛之道咸興葵藿皆傾管蔡之讐不啟所謂扶枝葉固根蒂播仁風匡大禮皆天下之為人弟者矣範人倫者莫先於元首遵孝理者在致乎精誠必有尊也天其父必有先也日其兄九服洽和若嗣高於廣大萬機洞照契承照於貞明故得孝道日彰休聲風靡指圓蓋兮欽若仰紅輪兮翼

爾由是海內無賊子姦臣吾君如此

祭法天道賦

以君子之祭能合天道為韻

宋

文彥博

稽立言於往典考至德於明君承大祭以無忒法高穹
而有聞初祀為儀隨時之義寧爽頻繁致潔用天之道
爰分昔者明王古之君子著誠將格於祖考昭孝遂嚴
於禋祀必防黷祭之失乃協奉先之美所以法乾造以
無違順天時而有紀外盡物而內盡志既表儉然春日
禘而秋曰嘗皆符倬彼禮無違者神其饗之順寒暑往

來之節感陰陽代謝之宜簋簋斯陳怵惕於履霜之候
黍稷是薦齋莊於濡露之時然則域中四大實本於天
禮有五經莫宗乎祭伊祭典之克舉與天道而相契不
踈不數爰遵奉若之規是享是宜蓋得欽宗之制是知
威儀抑抑夙夜兢兢將惟馨而是薦在無變以為能感
於神明舉十倫而寅奉行其典禮循四序以欽承故得
愉愉之忠是伸穰穰之福可納或宗祀之怠棄則禍淫
而暗合不然則何以歲祈百穀涓辰日以郊耕君主五

行體盛衰而祖臘則知將制其祭必本於天於以表乎
思孝於以示乎承乾率神而從固未彰於純嘏被袞以
象可同致於吉蠲偉乎潔彼踐籩具其蒞藻欲恭致於
薦享皆冥符於穹昊是則葛伯之為仇焉知天道

王道正則百川理賦

宋江行

物格大順化由至公本一道以持正致百川而會通庶
政修明端若承天之意衆流協應沛然行地之中嘗聞
宰物之工提平在聖大而覆載者既輔相以德廣而融

結者皆管攝以政故彼災祥繫乎邪正惟王有歸往之
義蓋在為公而水存乎準之稱遂皆得性何則明審刑
罰持循紀綱亶聰明而作后一好惡以遵王執此之政
兮堅若金石行此之令兮信如陰陽有猷有為屏邪心
於黨附或源或委暢柔德於靈長由是溫洛效珍滎河
薦祉若江漢焉莫不歸其潤若畎澮焉莫不循其理民
自絕於昏墊物大蒙於豐美坦周人之砥道率履大中
協夏后之神功救寧洛水宜非德之隆者高深遠近而

必及道之公者徧覆包含而不偏博既通於化育幽遂
達於淵泉上廣堯仁有既陂之九澤下殊幽暴無皆震
之三川况夫中和發於聖誠精稷交於神造萬物之類
尚率育而總總五行之本宜分流而浩浩平康在治茲
咸敘於彝倫脈絡交通遂安行於故道向若所持悖繆
所向阿私或盛外家之寵或簡宗廟之儀害既作矣時
將殆而白馬沉而福益遠金堤塞而民已疲是以雅什
貽譏益念沸騰之失漢臣建白重興涌溢之悲殊不知

水之為功物資其澤以之浸潤也其功倍以之灌溉也
其利百然而疏導則莫勝其勞壅塞則悉罹其厄惟王
道公正而不頗自然順適

畏天者保其國賦

以祇畏天道能
守其國為韻

宋

歐陽修

聖人以凝命恭默膺圖肅祇爰務畏天之義但彰保國
之規惟帝難之翼翼固欽於乾德為人上者兢兢慎守
於邦基用能御寶位而惟永隆昌運以咸熙者也探齊

王之式陳懿子輿之所謂將設治民之術先本為君之
貴且曰天惟簡在誠由乎不敢荒寧國乃治平是宜守
乎克自抑畏惠此方國欽若昊天實克遵於慄慄示無
爽於乾乾慮威宣咫尺之間所以嚴恭罔怠致疆啟幅
員之內所以底定無愆蓋由仰高明以惟勤遂邦家而
永保又新之戒斯在無逸之篇可考順帝之則始敦危
懼之誠俾民不迷終得阜安之道豈不以天者本降鑒
而是顯國者在緝綏而以興畏乎天表降鑒之其邇保

乎國示緝綏而可憑審雖休勿休之理遵日慎一日之
稱是故懼無菑以為懷是楚莊之勿伐不敢康而在念
識周成之有能夫如是則垂拱是圖持盈可久不遑啟
居兮以圓靈之是奉無敢暇豫兮以中區而自守昭事
而宜乎宗社咸寧之旨攸同欽承而惠彼民人設險之
功何有不然又安得惟寅謹爾匪懈昭其蓋足憚於覆
燾必克固於蕃維周詩垂陟降之文亦足畏也游雷著
修省之說於時保之至哉闡繹聖猷鋪昭皇極眷懃悚

以為本在撫綏而作式有以見惟天為大而君則之故
定於萬國

應天以實不以文賦

宋 歐陽修

天災之示人也若響應聲君心之奉天也惟德與誠固
當務實以推本不假浮文而治情彼雖不言謫見以時
而下告吾其修德禍患可消於未萌臣聞天所助兮惟
善則降祥德苟至兮雖妖而不勝皆由人事之告召然
後天心之上應若國家有闕失之政則當頻見於衆災

欲人主知戒懼之心所以保安於萬乘臣請述當今之所為引近事而為證至如陽能和陰則雨降若歲大旱則陽不和陰而可推陰不侵陽則地靜若地頻動則陰干於陽而可知又如黑者陰之色晦者陰之時或暴風慘黑而大至白晝晦冥而四垂日食正旦雨水木枝如此之類皆陰之為蓋陰為小人與婦女又為大兵與蠻夷若四方之為患則羣陰之失宜故天象以此告吾君不謂不至陛下所宜奉天戒不可不思是謂應以實者

臣敢列而言之若夫慎擇左右而察小人則視聽之不
惑肅清宮闈而減冗列則恭儉而成式况乎遠佞人者
孔宣父之明訓放宮女者唐太宗之盛德又若西師久
不利宜究兵弊而改作叛羌久未服宜講廟謀之得失
在陛下之至聖行此事而不忒庶天意之可回雖有災
而自息方今民疲賦斂之苦又值饑荒之年貨財盡於
私室苗稼盡於農田劫掠居人盜賊並起流離道路老
幼相連陛下視民如子覆民如天在於仁聖非不矜憐

故德音除刻削之令赦書行賑濟之權然而詔令雖嚴
州縣之吏多慢人死相半朝廷之惠未宣天至高遠也
惟可動以精誠民之休戚也皆繫君之好尚惟善政之
能惠則休符之並貺富有四海之大獨制萬民之上
一言之出兮誰敢不從百事責實兮自然無曠發號施令
在聖意之必行變災為祥則太平之可望今漢史有五
行之志尚書有洪範之文願詔侍臣之講說許陳古事
於聽聞可以見自召妖災雖由於時政能招福應亦自

於明君故未偃於風表周王之覺悟雉鳴於鼎成商帝
之功勲蓋恐懼修省者實也在乎不倦祈禳消伏者文
也皆不足云臣生逢納諫之聖明不問直言之狂斐惟
冀愚忠之可採苟避誅夷而則豈蓋賦者古人規諫之
文臣故敢上千於旒扆

陽禮教讓賦

宋 范仲淹

聖王制陽禮於百姓興民讓於九州覩射飲之斯在知
政教之所由我弓既張觀德之風遐被朋酒斯享序賓

之義咸修觀其司徒之職既揚王者之教云下使穆穆而鄉飲俾濟濟而燕射將以弧矢之利習彼威儀復於樽俎之間宣其教化至若洞啟澤宮射夫來同內叶和平之志外敦廉順之風揖讓而升非尚六鈞之勇進退可庶不矜五善之功此射之讓也邦教攸崇又若以年以品會於鄉飲在獻酬之無謬居長幼而必審貴賤位矣三賓之象不踰和樂興焉百拜之容弗寢此飲之讓也國人是稟則知邦禮循循以教萬民所以安天下於

不競所以教域中之有倫射不主皮息爭心於君子酒以成禮導和氣於鄉人是知用之而在化可久廢之而其化則不斯射也可以止其暴亂斯飲也可以樂其富壽所以反當仁之義以勸四方遵成魄之規用寧九有然則謂其陽也取其吉而為名謂其讓也取其和而不爭於以見莫善於禮於以見與世作程侯以明之罔替君臣之義禮無違者遂諧賓主之情遂使德藝可觀忿肆端已乃沿事以興教蓋因時而立紀故聖人務焉則

違之者寡矣

政在順民心賦

宋范仲淹

王者廣育黔首誕布皇明闡邦政而攸叙順民心而和平振窮恤貧必俯從於衆望發號施令實允叶於羣情昔管子以祖述大猷發揮明主垂教之言斯著為政之方可觀以謂逆其民而理者雖令不從順於民而化焉其德乃普是以究其所病察其所宜禮應時而沿襲教隨俗以彰施欲求乎廣所及也必在乎俯而就之彼患

困窮我則躋之於富庶彼憂苛虐我則撫之以仁慈於
以見百姓為心萬邦惟慶無一物不得其所無一夫不
遂其性所以感其和氣所以為之善政故得上下欣合
莫聞不協之謀遐邇悅隨每覩易從之命豈不以政者
為民而設民者惟政是平違之則事悖順之則教興乃
古今之必重實賢聖之所能亦猶梓匠任材因曲直而
制作化工造物隨大小而陶甄是以布政從民者黎元
克信驅民從政者羣心不狗思柔遠而能邇必去逆而

效順舉刑罰罪因衆棄而方行列爵養賢由僉諧而後
進懿夫施此彝倫洽彼生民在上者弗私其欲居下者
孰敢不遵務材訓農皆因民之所利布德行惠常捨己
以從人今我后稽古省方順時察俗上克承於天道下
弗違於民欲有以見善與物之咸享實無幽而不燭

通其變使民不倦賦

以通物之變民
用無倦為韻

宋

蘇軾

物不可久勢將自窮欲民生而無倦在世變以能通器

當極弊之時因而改作衆得日新之用樂以移風昔者
世朴未分民愚多屈有大人卓爾以運智使天下羣然
而勝物凡可養生之具莫不便安然亦有時而窮使之
弗鬱下迄堯舜上從軒義作網罟以絕禽獸之害服牛
馬以紓手足之疲田馬而盡百穀之利市馬而交四方
之宜神農既沒而舟楫以濟也後聖有作而弧矢以威
之至貴也而衣裳之有法至賤也而臼杵之不遺居穴
告勞易以屋廬之美結繩既厭改從書契之為如地也

草木之有盛衰如天也日星之有晦見皆利也孰識其所以為利皆變也孰詰其所以制變五材天生而並用或革或因百姓日用而不知以歌以拊豈不以俗狃其事化難以神疾從古之多弊俾繇吾而一新觀易之卦則聖人之時可以見觀卦之象則君子之動可以循備物致功蓋適推移之用樂生興事故無怠惰之民及夫古帝既遙後王繼踵雖或不繇於聖作而皆有適於民用以瓦屋則無茅茨之敝漏以騎戰則無車徒之錯綜

更皮弁以圓法周世所宜易古篆以隸書秦民咸共乃
知制器者皆出於先聖泥古者蓋生於俗儒昔之然今
或以否昔之有今或以無將何以鼓舞民志周流化區
王莽之復井田世滋以惑房琯之用車戰衆病其拘是
知作法何常視民所便苟新令之可復雖舊章而必擅
神而化之使民宜之夫何懈倦

三法求民情賦

以王用三法斷
民得中為韻

宋

蘇軾

民之枉直難其辨王有刑罰從其公用三法而下究求

輿情而上通司刺所專精測淺深之量人心易曉斷依
獄訟之中民也性失而習姦邪訟興而干獄犴殘而肌
膚不足使之畏酷而憲令不足制其亂故先王致忠義
以核其實悉聰明以神其斷蓋一成不可變所以盡心
於刑此三法以求民情孰有不平之歎若夫老幼之類
蠢愚之人或過失而冒罪或遺忘而無倫或頑而不識
或寬而未伸一踏禁網利口不能肆其辯一定刑辟士
師不得私其仁孰究枉弊就明偽真刺宥舍以盡典公

原其實輕重中而制法何濫於民雖入鈎金未可謂之
堅雖入束矢孰可然其直召伯之明猶恐不能以意察
臯陶之賢猶恐不能以情得必也有秋官之聯贊司寇
之職臣民以訊讞國憲以何疑寬恕其愆斷人中而無
惑然則園土之內聽有獄正之良棘木之下議有九卿
之詳五辭以原其誠偽五聲以觀其否臧尚猶哀矜而
不喜悼痛以如傷三寬然後制邦辟三舍然後施刑章
蓋念罰一非辜則民情鬱而多怨法一濫舉則治道汨

而不綱故折獄致刑本豐亨而御世赦過宥罪取解象
以為王得非君示天下公法與天下共當赦則赦姦不
吾惠可殺則殺惡非汝縱議獄緩死以中孚之意明罰
敕法以噬嗑之用彼呂侯作訓赦者止五刑之疑而王
制有言本此聽庶人之訟噫刑德濟而陰陽合生殺當
而天地參後世不此務百姓無以堪有苗之暴以虐民
者五叔世之亂以酷民者三因嗟秦氏之峻刑喪邦甚
速儻踵周家之故事永世何慙大哉唐之興三覆其刑

漢之起三章而法皆除三代之酷暴率定一時之檢押
然其猶夷族之令而斷趾之刑故不及前王之浹洽

賞以春夏賦

以天子行賞欽
順時令為韻

宋

歐陽修

賞出於國時行在天紀勲庸而有序順春夏以昭宣無
忘爾勞法蠶生而布惠用嘉乃績因長養以旌賢原夫
執政者君為民之紀懼賞罰之一失則恩威之兩弛受
焉不以其私賜之非為其喜蓋夫欲固其國者必謹國
之常能奉乎天者是謂天之子將出令以無僭必順時

而合軌顯庸制爵爰占星鳥之中茂息建官當俟薰風
之始且夫春居東以首歲夏司南而執衡在氣為燠於
時主生東動也事以之起南任也物以之成我所以推
本萬物之理欽象四時之行政刑由是以有度寒暑於
焉而不爭頌以土田順木行而養育昭其服物助火德
之光明故曰天之大端在陰陽君之大柄在刑賞操其
柄以歸已求其端而取象法太族贊陽之月行慶有常
體林鍾種物之時勸功無爽誠以賞當則民協澤流而

德深但慮過時之失敢懷虛受之心故月令有布德之
文前規具在景風為賜爵之候往牒攸欽嗚呼王者畏
天以臨民天道在人而可信事與時合則為和而為福
時與事逆則有蓄而有饑在乎察動靜以為本布仁恩
而克慎亦猶獮田主殺非仲秋而不行議獄斷刑須大
冬而乃順故能光昭國體欽奉邦彝用豈有於踰德舉
無聞於拂時且異夫賜以鞶纓示假人而取誚贈其袞
冕譏錫命以非宜大哉君之舉者必書上之出者為令

苟違時而不度懼招尤而失正故左氏載聲子之言以
戒後王之立政

王言如絲賦

以有云如絲演
若綸組為韻

唐

謝

觀

君言之重兮發彼加人如絲之細兮出已成綸將植樞
機之本必滋秒忽之因初具體而微降一旬之繩準俄
觸類而長入百司而縷陳是知作彼紀綱從而推闡密
旨欲布殊私以展透冕旒以尚細入鈞衡而漸演及爾
如貫審知詞理絲絲搏之則微益見言密爾爾且夫謂

至密而已著將未聞而已聞遂意淫繹隨聲糾紛無類
而洪纖起散有條而派脈別分離一庭之間聽皆歷歷
出九門之外遠已云云是故遐邇羈縻上下聯絡毛舉
之讚是卹蠶食之誠詎作詔多事而折藕難比寫綢繆
而曳緒不若遇終軍之一請便吐長纓後龔遂之載言
俄陳亂索不同抱布而取詎等如柔而吐孜孜下問義
同小往大來軋軋若抽事符以索繼組不可卷也引而
伸之不滯異維舟之紼無點殊墨子之絲與奪而起於

分寸傾危而失在毫釐夫如是上言也不可下聞
也不得不受知駟足之難及保三緘之可守語不墮而
寰宇歸心思無邪而蠻夷稽首可以網羅八表可以倫
貫九有然後緝熙不紊條章有餘自契不言化矣豈假
聞斯行諸方知微細之喻也敢願戒慎之所如

信及豚魚賦

以聖朝道孚
微隱為韻

唐
封孟申

皇帝奉天心執人柄自毛羣之賤品及水族之微命咸
安其生各遂其性小既化矣諒庶物以知歸大亦宜然

由一人之有慶允所謂法中孚以立極體渙汗而施令
其信也符天之不言其德也與道際其聖徒觀其行藏
出處安逸逍遙時乃上冰且不爽於春候時乃登俎幸
見錄於清朝何政令之不誠何性命而不保清濶自適
則樂我深泉行葦不傷則樂我豐草趨時者保去留之
性默處者契雍熙之道懿夫堯之為理路行皆如此易
之取象叶義必同塗物苟在微則豈唯豚爾類苟在隱
則何必魚乎可謂德侔造化道泯虛無無遠不均將由

夫大而不可約何幽未及詎同彼小且未孚穆穆魏魏我
后垂衣域已臻於仁壽信乃及於賤微恣彼噉喙在安
流而長逸睹其膚革與至道而俱肥斯可以見聖皇軌
物誠理是非奚獨龜龍假而表瑞麟鳳降而增輝而已
哉士有象既得而言欲忘信已誠而行庸謹安貞誓於
期耄慎獨稟乎韶亂觀光上國感豚魚之以孚願仕清
朝匪巖穴之可隱

牛羊勿踐行葦賦

以皇化所加德
同周道為韻

唐王 祭

育物恩廣垂衣道豐流德澤於行葦示仁心於牧童且
曰驅爾牛羊勿近萋萋之道恐其蹄角踐傷泥泥之叢
斯乃家國攸用華夷所同俾遂生榮之性仍敦忠厚之
風是以發自睿情指乎幽渚伊方苞方體之地匪或寢
或訛之所未逢至化其生有類於蒿萊今被仁風所貴
不殊於稷黍懿夫拂水沙際搖煙路傍安可縱三犧而
蹂躪放千足以跳踉莫不欽聖教感吾皇戒彼畜之奔

逸免斯條之折傷由是綠野分驅蒼葭共保但跼桃林
之坂自斲金華之草春風澤畔如生遂字之心落日山
邊盡認下來之道况乎挺本方茂為航可嘉霏靡而爭
芳荇葉參差而競秀蘭芽若使大武斯履柔毛所加則
八月洲前無復凝霜之葉二秋江上難逢似雪之花是
以咸仰嘉猷式遵玄德牧者既以承其教虞人得以修
其職故能隔瑩蹄於平野莫往莫來限墳首於荒郊自
南自北然後澤靡不洽恩無不周國有殷充之實家無

罄匱之憂網不入於污池斯言莫偶斧以時於林藪厥
義難侔偉夫至理彌彰前經可駕遠符大雅之什允協
文王之化因知皇王之教所憂不惟禾稼

聖人不貴難得之貨賦

以題為韻

唐王綽

披老氏之遺文見聖人之垂則戒君上之所好慮天下
之為惑且物有藏之無用求之難得若將貴也則廉貞
之風不生吾苟賤焉庶嗜慾之原可塞斯乃復道德之
本為政化之端雖聞乎無脛以至曾忘其拭目而觀於

以息數斂激貪殘皆重黃金我則捐山而孔易咸嘉白
璧我則抵谷以奚難莫問瑕瑜詎論妍不節儉之德既
著饕餮之名何有表因禁後應無為狗之勞珠自鍛來
已絕伺龍之醜只如照車於魏徒稱徑寸之貴易地於
秦虛重連城之珍一則受欺於疆國一則見屈於聖人
豈若端耳目寂形神視彼瓊瑰之類齊乎瓠甌之倫義
動貪夫皆少私而寡欲化移流俗盡背偽以歸真可使
路不拾遺人忘好貨顧予有摘玉之志俾爾無攫金之

過則以此行道而大道復隆以此移風而玄風再播且
夫君教矣人效之若不去其奢而返其本必將眩爾篋
而控爾頤亦何必樹美珊瑚競列華筵之翫布求火浣
長充內府之資方今闡靈符握金鏡若能來淮夷之琛
不以為貴入王母之環不以為盛上崇朴素之道下率
廉隅之性豈惟咸五而登三可與大庭而齊聖

漢文帝却千里馬賦

以清道乘輿前
警後蹕為韻

唐
闕名

皇天眷命兮炎漢斯興
運鍾三葉兮文德可稱
六龍整儀賤織英而不服
五馭飭駕却良駿而不乘
猶是遐邇授首蠻夷屈膝
梯山航海者望之如雲
納賫貢珍者府無虛日
別有吉良之種渥洼之
出媿飛黃於軒宮奄驪
駟於周室歷無草以入
貢涉流沙而效質就御
服以馴養願驅馳而警蹕
其體也廣膺毛服其目也
擁後決前眸點漆而鏡
朗權應規而壁懸稟月
精於地法星象於天鬣
上朱明溝中血走朝辭
辮髮之俗暮憩雕題之
數

驕驕慙專美於前駮裒愧垂名於後及夫噴玉勒而沫
素鳴金珂而響清指九重以獻壽勒百禮以效誠帝於
是宣皇風馳聖道前賢斯鑒古訓斯考差轍迹於穆王
想旅燹於召保乃宣言曰朕法天以清淨法地以玄虛
有典有則不疾不徐稍星之旗逮於前步彗雲之旆設
於後車吉行三十而當息良馬千里而馬如爾以馬為
寶我以德為輿與其授受以交喪曷若乾乾而捨諸獻
馬者乃默覲慙顏低徊弔影步遷延以眷眷神寂寞而

耿耿於是德日洽祚惟永俾來葉之嗣君仰斯道以自
警

却千里馬賦

以上之所班諸
侯不貢為韻

唐

獨孤申叔

惟漢德之雍熙俾遐荒兮肅祗布澤所治致遠人之樂
只任土必貢奉良馬以來思殊乎皎皎陋乃駢駢冀八
鑿以御矣齊四牡以維之由是朝發於窮邊夕獻於君
所倏追風以掣電邈千里兮一舉仰駮驥之居周鄙驢
驢之在楚故將進薦於象魏庶得超遙於苑囿帝曰斯

馬爾其還與旅焚之訓今則皎如歸獸之義寧當忽諸矧乃乖乎法駕而不合於乘輿且帝之御也厥儀惟舊帝之動也其道惟守驅千乘以啟前羅萬騎以居後分青旌兮在左揚素旆兮在右儼五路以居中矯六龍以齊首蘇鑿是饗將節乃疾徐次舍有期豈宜乎奔走蓋順之而則可信違之而則不雖千里兮足珍於一人兮何有矧乃場苗既食馬政攸班間以赤兔兼之白鬮叶圖之駒伏阜稱德之驥在閑足以驅馳於九域之內足

以巡狩於六合之間宜乎旋爾故鄉歸於舊壤超乎霄
漢適彼莽蒼庶逐北風之思却從東道之上俾得交頸
畜土翹足荒陬克全真性有歸羣休同越地之放象似
桃林之罷牛豈彼驂騑卒見羈於造父寧同屈產終服
御於晉侯是知漢文之德彌尊歸馬之猷克中示後之
立國者盡規矩之以却遠方之貢

却走馬賦

以天下有道無
所用之為韻

唐

闕名

貞元初既平凶醜海縣安阜歸戍人於田里却戰馬於

隴畝所以示力爭之無益昭靜勝之足有乃命司武闢
御阜出羣駒於紫陌閱衆驥於黃道吉行之乘存六駮
而有餘無戰之時惜萬蹄而空老於是脫羈鞅任超逾
騰驤於古塞之外飲齧於洪池之隅恣蕭蕭之永逸免
逐逐之長驅天殿初辭誠貴人而賤畜農車僮駕亦以
有而之無留之則踈其駿足而不與人共捨之則遂其
生適而省其國用顧東道之常來凌北風而遠縱曩者
揚鑣噴沫環甲鳴鞭角紫燕以行地隨飛龍而御天追

風於陣表絕電於君前功德難忘信彌多而不厭驕奢
作戒故雖愛而必捐任物自然仁之上者修文偃武德
之要也屏危事之形影張禮容於宗社尚茲恬淡見道
發宸衷釋彼權竒知化成天下材雖駟駿用亦有時艱
難則雲從而騁力開泰則野逸而呈姿昔常代於人勞
良多効矣今則遂其天性非曰棄之感君恩之有序彌
天壤而得所望驂駢而躑躅依水草以容與彼周武之
歸漢文之却曷足方我皇之明舉

焚雉頭裘賦

以珍異之服焚去無取為韻

宋

文彥博

晉武帝以德繼惟睿功齊乃神焚雉裘而崇儉負鳳宸
以臨民化被元元必被先王之服燔茲楚楚蓋除希世
之珍原夫聖澤遐敷皇風廣被當百度之攸敘見萬邦
之從乂諸侯述職既息貢於瑰竒曠俗賓王亦咸輸於
珍異伊彼程據當茲盛時庶為臣之美矣必竭節以事
之由是製此雉裘將充乎任土之貢獻諸龍陞爰陳乎
執帛之儀徒觀其麗彩鮮明爛光彬郁彌縫皆自於藻

翰制作遂成於珍服異王恭之鶴氅但取清竒殊李兌
之貂裘惟彰溫燠帝乃念茲至巧命以俱焚慮淫靡之
下瀉薄俗恐奢華之上惑明君俄委燎原之勢遂同有
齒之焚紅燄初騰漠漠而漸成餘燼青煙欲斷依依而
尚藹微芬然後珍怪罔求姦邪悉去六合咸歸於儉德
萬化永安於鴻緒雖斯裘之甚美焉能衣之以奉天且
厥用之至繁豈可被之而當宁若然則聖政敷於九有
帝德合於三無闡易俗移風之道遵還淳返朴之途雖

文帝之罷露臺尤難並矣縱武皇之焚甲帳未可同乎
則知德不廣無以化蚩蚩之氓儉不崇無以成蕩蕩之
主故焚裘之可美在去奢而有取既著美於一時遂流
芳於千古者也

任官惟賢材賦

宋 范仲淹

官也者名器所守賢也者才謀不羣當建官而公共惟
任賢而職分大則論道經邦帝賚之猷允著小則陳力
就列家食之歎無聞王者臨萬邦之民列百揆之職將

致理而有成故掄材而不惑示以好爵惟皇之士攸臻
致於周行命世之才盡得始其精選不貳明揚勿休察
其言之所謂觀其行之所修苟進者不可不慎待用者
予取予求勸農免人咸委循良之德處煩理劇悉資濬
哲之謀豈不以官人者一人之股肱兆民之綱紀厥用
也雖各司其局厥功也蓋同歸於理非其人則貽民之
憂得其人則致君之美是故孜孜於仄席憂在進焉
俾濟濟以盈庭野無遺矣蓋以非賢不乂得士則昌度

其才而後用授其政而必當上以見知人之道下以見稱職之方亦如大厦構成惟美材而是取良工制作得利器而允臧自然讒邪知禁惟君子之是任政教昭宣致王業之不愆庶類咸若羣方晏然其或未精黜陟弗辯媿妍素餐之謂必作嘉魚之詠莫傳曷若我命以鈞衡乃負鼎之明哲升乎諫諍必及雷之忠賢大哉考古典之訓謨覽前王之取捨魏魏堯帝得五臣而洽域中赫赫軒皇用六相而光天下故我后法二帝之垂衣舉

多賢者

得地千里不如一賢賦

宋

范仲淹

地廣千里功虧一賢故開基之大矣寧命世以生焉附
益我疆雖有邦畿之遠發揮王業難居家食之先得不
載考謨猷旁稽士實延表之境土雖衆挺特之才難可
惜彊吞是戒豈一千乘之多為禮聘斯行在五百年之
間出又何取險包絕壑深控澄江非形勝於百二貴國
士之無雙尋師之道路咸歸何能翼聖展驥之途程盡

入詎可經邦是以攻掠無聞簡求可考匪煩開拓之力
唯取弼諧之道秦商於而齊即墨非我之求傳巖野而
渭水濱是吾所寶唯賢也其功莫料唯地也於用如何
自欲得人之盛豈須拓地之多爵舉之流可進之而授
賞目極之所難獻之而請和斯蓋意切求賢事非避地
雖沃野之咸在諒竒才之足懿任附庸之國衆胡比盡
忠縱兵賦之數多罔加餘智豈不以賢之得雖少必貴
地之有雖多曷能捨地得賢兮邦基以立失賢有地兮

國難隨興是故治亂咸繫古先足徵鴻溝割而楚亡惟
賢不用昌國去而燕奪何地堪矜在乎啟土罔資虛襟
是急皇明由是以彌遠鴻業於焉而允緝若然則議賢
者之深功何城而能及

三公調陰陽賦

以中輔之職變
理陰陽為韻

宋

陳襄

朝無闕政官設居方故三公俾輔和於邦國用調燮於
陰陽居槐位以分班洞均舒慘列鼎司而效職灼序柔
剛伊昔令王寵綏縣宇以謂設官分職兮非政而曷任

曰陰與陽兮非公而莫主由是統爾和氣委茲中輔競
競論道順消長以無差業業在朝致中和而茲取誠以
翼奉君上贊臨域中竭股肱而胥附調變化以無窮位
應六符正居夏居冬之氣爵隆八命定為刑為德之功
况夫子育羣生君臨大國二儀有愆伏之運四氣異往
來之則得不命乃上公謹茲常職庶天令以惟和禔歲
功而無忒卓爾量才之任式序為綱居然明理之司用
期合德則知陰不治也惡肅殺以非宜陽不順也慮生

成之有遺故我法三光而昭若專二氣以調之使萬物
各得其所庶人不失其時稟四海之儀率正耀藏之度
居萬民之表庸均唱和之期夫如是則居職儼然經邦
翼爾順成開闔之化曲致雍熙之美是以邴吉有問牛
之志蓋務協和陳平無對獄之辭用勤變理懿夫國之
治也必頒官而分務物之生也蓋抱陽而負陰惟此承
君之職式勤觀變之心九卿通寒暑之權功惟並致太
史司星辰之候事匪同欽誠哉茂建官儀昭垂邦牒萬

機之政是務三合之宜用變自然天地節而歲時和致
生成之允協

六官賦

宋 范仲淹

伊六官之設也所以經綸庶政輔弼大名治四方而公
共宅百揆而職分克勤於邦同致皇王之道各揚其職
以成社稷之勲王者富有八紘君臨萬國何以致熙熙
之化何以崇巍巍之德欲行其教必舉賢而授能將致
其功故列官而分職乃立冢宰爰命司徒一則執掄衡

之柄一則掌土地之圖總其庶官位定而上下皆正敷
於五教民成而怨惡曾無至若宗伯執事而惟和司馬
論功而無曠典三禮而稽古統六師而安上俎豆之事
登降而不失其宜軍旅之容征伐而無有不當又若司
寇之治可畏司空之政惟常王憲綱而有典有則勸農
功而無怠無荒御百姓於五刑罔敢作亂宅兆人於九
土孰不來王惟茲六官邦國是保叶贊王業恢張聖造
所以均天地之化所以全君臣之道軒皇六相稽其義

而弗違舜帝五臣比其功而可考夫如是則六官之任也司二儀之理法四時之名於以平天下之政於以安天下之情得其人則聖政咸若失其人則王化不行雖乃武而乃文各從其理體亦同心而同德共輔於文明今國家博采遺賢陟明多士將五帝以齊邁命六官而共理有以見萬國一家頌聲作矣

六事廉為本賦

以先聖之貴廉也如此為韻

宋

蘇

軾

事有六者本歸一焉各以廉而為首蓋尚德以求全官

緒條分雖等差而立制吏功旌別皆清慎以居先器爾
衆才繇吾先聖人各有能我官其任人各有德我目其
行是故分為六事悉本廉而作程用啟庶官俾厲節而
為政善者善其事能者能制宜或靖恭而不懈或正直
而不隨法則不失辨別不疑第其課分事區別矣舉其
要兮廉一貫之蔽吏治之否臧必旌美效為民極之介
潔斯作丕基所謂事者各一人之攸能所謂廉者通衆
賢之咸暨擬之綱畧先綱而後目况之布帛先經而後

緯於太宰處八法之末厥勢既分在西京同大孝之科
於斯為貴乃知功廢於貪行成於廉苟務黷貨都忘屬
厭若是則善與能者為汙而為濫恭且正者為詖而為
儉法焉不能守節辨焉不能明嫌故聖人惡彼敗官雖
百能而莫贖上茲潔行在六計以相兼此蓋周公差次
之小宰分掌者考課則以是黜陟大比則以為用捨彼
六條四曰潔晉法有所虧焉四善二為清唐制未之得
也曷若獨標茲道分貫其餘始於善而迄辨皆以廉而

為初念厥德之至貴故他功之莫如譬夫五事冠於周
家聞之詩雅九疇統之皇極載自箕書噫績效皆煩清
名至美故先責其立操然後褒其善理是以古者之治
必簡而明其術繇此

賢不家食賦

宋 范仲淹

國家廣闢四門惟賢可尊俾進身於祿位寧退食於丘
園出仕文明萬鍾之榮自足不居側陋一簞之樂奚論
當其王道勃興聖人在上納忠良而罔怠庶弼諧而無

曠敦三接而何善不臻達四聰而無遠弗訪思舉之士
效明試於勲庸崇德之人恥素飧而高尚莫不濯纓交
進束帶相先上既諧於輔聖下絕見於遺賢克勤於邦
自重茵而列鼎不出其位寧鑿井而耕田遂使獻替無
虧經綸是假外兼濟於黔首內盡忠於王者行爵出祿
但見其聖人養賢論道經邦詎聞乎君子在野豈不以
天下之政也惟賢是經天下之情也得賢而寧所以宅
茲百揆所以康彼萬靈靡吟皎皎之駒已縻好爵且詠

呦呦之鹿盡宴明庭彼茹藜而隱者亦士之醜飲泉而
居者何樂之有曷若我美祿是干良時是偶如蛟龍兮
得雲雨異麟鳳兮在郊數是以子牙就聘求魚豈戀於
水濱伊尹逢時執耒寧思於田畝美夫聖主斯在明賢
不遐咸簪纓而奉國豈非溥而在家端冕之前既協鹽
梅之用衡茅之下誰興葵藿之嗟士有學稟素風運逢
皇極方勵入官之業獲頌養賢之德幸奏藝於堯階庶
無慙於家食

鴻漸于陸賦

以鴻在於陸為世儀表為韻

宋

文彥博

觀乎大易嘉此冥鴻因漸陸以斯顯遂為儀而可崇欲
潔於身克務乎升高自下不濡其翼寧煩乎激水搏風
原夫居賢之象載觀設卦之由斯在體於鴻則蓋取進
動漸於陸則爰求夾壇寧同越鳥依棲永戀于南枝有
異莊鵬運轉常歸於北海徒觀其載飛載止匪疾匪徐
矧徊翔而翩若必高潔以依於翻迅羽以噍噍弋人何
慕冲層峰而岌岌陽鳥攸居高遂雲飛長辭水宿別海

上之鷗鷺鄙波中之鳧鶩肅肅隨陽翩翩遵陸見可而
進同鳳鳴於高岡靡常厥居類鶯遷於喬木豈不以陸
者地鎮之峻極鴻者羽族之珍竒翼若詎重於軒翥屹
然迴出於喧卑非來者之漸矣安跂予而及之鸞游而
蓋不足取隼擊則又何能為將候鴈以同賓羽翮既就
與時龍而共起燕雀焉知不雜塵游寧隨波逝固殊遵
渚之列自有鳴山之勢類彼勤行之士卓爾離羣同乎
高蹈之人飄然出世且夫棲陵木者甫濱於山足集磐

干者尚邇於水渚苟人言之有厲則世網以見縻曷若
我將翺將翔首據高明之地爰居爰處俯為衆庶之儀
孰謂乎無所取才不離飛鳥或俯集於雞樹或下臨於
鳳沼且其羽翼清虛可以為天下表

越裳獻白雉賦

以周德方興遠
夷入貢為韻

唐

謝觀

憬彼越裳南之一方感皇化於蠻貊獻白雉於周王原
夫獲皎潔之姿奉鴻私之德閉靈質以雕玉馳星使於
絕域夕辭南土形迷夜月之光曉向北風影混朝霜之

色嗟乎跋涉空濶江山阻修途程萬里星歲幾周過吳
門而練影光透染曹風而麻衣色浮然後達成周之大
庭陳本國之所執歷雉門而捧進隨鴻臚而坐入俯雕
題而就位拱䟽趾以前集利觜玉植修領縞戢風搖細
尾當軒而練帶長垂日照輕毛在手而雪花孤立以其
耿介無比貞明可稱距列瑤刺身攜鶴翎徘徊而隳駒
其轉奮迅而振鷺將興其淨珉潔其神露凝皎皎敷粉
亭亭卓冰自稟時清之化誠非日浴之能勿以臣之賤

所獻無徵勿以禽之微所來自遠蒙恩覃而化及似風
行而草偃是以齎此嘉瑞唯憂後時欲以明誠上答敢
以遐阻為詞作獻靡遼東之豕不緇殊墨子之絲一以
見澤兼鳥獸一以彰德被蠻夷王乃愀然色動沉然念
茲發明南國之忠汝之遠矣舉奏殊方之瑞予甚嘉之
方知雉之潔兮可珍士之潔兮殊衆可珍猶尚於夷俗
殊衆可標於歲貢儻援引而不遺願舉白之一送

越裳獻白雉賦

明
劉克正

覽聖緒於前代兮考王德之所隆伊蒼姬之撫宇兮景
運闢以熙融惟武之以仁易暴兮成繼序而克崇后既
賢而紹聖兮左右以元輔旦之公忠蕩太和於宇內兮
宅九土以帡幪若越裳之荒遐兮亦感德而來同紛旅
庭其底貢兮奉瑞物以先容嗟爾其負海以為邦兮固
窮南而作域溘其濟乎炎之洋兮川嶺紆迴以巉巖望
中華之恍惚指北斗以下睇兮奄至乎天子之國吾始
未知夫道里之幾何兮曾不可以遐計而周度俗既異

譯以殊文兮托累譯以通忱杳上世吾罔有聞兮實重
勤乎遠人顧正朔所不加兮恐德澤之未淪謝厥贄以
無享兮賓其衆而弗臣孫大美而弗居兮固玉道之宏
也歷九州而致物兮亦遠人之所從也惟風雨之順時
兮無靈烈之為虐暨溟波之不揚兮效厥靈於海若蓋
三年而今茲兮詎奄聞於旬朔吾儕僻陋其何足以知
兮亦藉荷於厚薄向故老以訊言兮識聖人之有作吁
嗟白雉胡為兮遵山梁而飲啄含元氣以自適兮包純

質以為絡匪儔侶之所同兮矜錦文之紛錯惟耿介之
獨持兮故完潔而不濁壘壘霜毳以連翩兮迴玉立而綽
約既失皎於素鷗兮亦奪鮮於皓鶴陟高岡以朝雉兮
應鳳鳴於丹穴張大網之恢恢兮掩修容之濯濯性馴
擾以不驚兮若依仁而有覺雖僻壤之自產兮乃王瑞
之攸托眷羽族之足珍兮豈終淪於夷落仰大邦以來
獻兮媿將承之猶薄惟四靈紛其畢至今既雜還於郊
郭伊茲鳥之細微兮寧增殊於鎬樂諒來者之無拒兮

翼余誠之卒獲離荒裔之越絕兮奉靈圖之豁廓苟辛
齒於來儀兮縱疎遠其奚忤惟元輔之虛已以翊贊兮
乃致厥美於嗣王創指南以適歸兮示柔遠之不忘命
太史使按圖兮考符應於舊章嘉我祖之肇郅兮始鳥
翼而發祥赤鳥流於王屋兮我武赫以維揚逮旅葬之
來庭兮乃遠人至而周道光予明辟亶其克肖兮揚大
烈而寔昌德下及於游潛兮亦上格於飛翔肆無遠而
不屈兮奄獻瑞於殊邦物豈無因而至今漸王澤之汪

洋維金氣之馴服兮，
亶白質之來章。屬火德之當陽兮，
乃徵發於南方。何遠物之足貴兮，
固將比德於虞唐。伊明明之基命兮，
荃受祉其未央。純厥修以比德兮，
合天人之所章。令遐邇其若一兮，
亦永綏於靈長。吁嗟王路邈其未有底兮，
胡寧玩物而怠康。於是王乃為白雉之歌，
歌曰：載戢干戈，承先烈兮。遠至邇安，
白雉潔兮。股肱惟良，翊朕德兮。公旦乃拜手稽首，
賡載歌曰：皎皎雉兮，來南中兮。惟王謏德，
臣何功兮。緝熙敬止，永保終兮。

越裳獻白雉賦

明

吳中行

伊皇周之奕葉兮播太和以重熙嗣謨烈而式序兮方
履盈其受釐元相惟德之勤兮輔明辟於垂衣錫羨卹
膚膺實錄而凝麻兮敕天命於時幾繼離保泰仰丹書
以作則兮光帝德於華夷繫越裳氏之遐逝兮知中國
之有聖纘緒者穆穆負屨者明明迓衡一德綏猷四境
波氛已恬休徵時應美矣復彰傳之益盛邛夔之遙裔
奉王朔以為正豈自阻於炎荒亦願覲夫文明之彪炳

通重譯以來王叩疆闕而請命絕域窮徼回面易聽編
髮駢趾異飾詭覲望帝閣以咸賓兮欽皇綱之維競既
梯航而至止兮覩禮樂之繽紛執方物以為贄肆庭實
其何所陳惟服食器用為德之致兮迺弗產於粵濱雖
火齊夜光之璀璨兮恐寶玉之不見珍鳴岐之鳳游數
之麟既克致夫上瑞又奚假於遠人瞻皞雉之純潔實
羽族之靈馴必聖德之被物故天心之示禎遂底貢乎
萬里庶輸款於九宸華哉為文翬乎其翼形迷夜月之

光影借朝霜之色聿呈祥於素絲欲增輝夫赤舄彩移
圓扇之陸離用備舞干之煒奕豈興歎於在梁匪解顏
之可弋邁殷宗之鼎雉兮茲神休之申錫同禹甸之夏
翟兮更來儀於重譯維時鸞輿御朝鵷序列行化覃海
寓德洽泳翔集羽林而駿奔紛虎賁以鷹揚詔司賓陳
懷遠之儀兮走玉帛之趨蹌俯雕題而就位兮瞻崔駟
以欲颺隨鴻臚而稽顙兮獲上衽於明光豈異物之足
貴兮亦誠享之所將惟來者之不拒兮庇我闔於八荒

造指南之車以導其歸兮示綏柔之不忘既命太史爰

考舊章惟我周之開國乃覆翼以為祥嗣赤鳥之薦瑞

肆倉錄其寢昌覽茲白雉獻自南邦彰純休之方篤驗

火德之當陽奄溥澤於鳥獸豈讓德於虞唐君臣合德

寰宇流芳稱鴻名於罔極垂駿烈於無疆亂曰景運邛

隆泰階平兮皇極懋建文教明兮鳥獸魚鼈罔不寧兮


紹基嗣服撫盈成兮越裳遐陬暨聲名兮濯濯者雉獻

於廷兮惟德致物鑒彼誠兮卷阿矢音此其鳴兮昭受

帝眷永底民之生兮

御定歷代賦彙卷四十三

謹案卷四十二第二十八頁前七行帝堯聰明文
思按書經聰作欽



總校官庶吉士 臣張能照
校對官編修 臣楊壽楠
謄錄監生 臣潘奕基